

Kalaallit Nunaanni pinerluttulerinermi inatsisip allanngortinneqarnera pillugu siunnersuummut missingiut pillugu Namminersorlutik Oqartussat akuersissuteqarnissaat pillugu inatsisartut aalajangiiffigisassaattut siunnersuut (Illoqarfimmi illuliorfiusimasumi illuinnarsuutunik eqqunngitsumik iginnerup pinerluutinngortinneqarnera, takunnissimasunik illersuinerup annertusinera, inip nakkutilliiffiusup atorneranut piumasaqaatinik iluarsineq il.il.)
(Peqqissutsimut, Isumaginninnermut Inatsisinillu Atuutsitsinnermut Naalakkersuisoq)

Akissuteqaat

(Peqqissutsimut, Isumaginninnermut Inatsisinillu Atuutsitsinnermut Naalakkersuisoq)

Aappassaaneerpeqarnera

Inatsisartut aalajangiiffigisassaattut siunnersuummut massumunnga Inatsisinut Ataatsimiititaliap peqqissaartumik suliaqarsimanera pillugu Naalakkersuisut qutsavigerusuppaat.

Saqqummiunneqarnermini isikkumisut isikkoqartillugu ataatsimiititaliap isumaqatigiittup siunnersuut akuersissutigimmagu Naalakkersuisut nuannaarutigaa.

Inunnik najugaqarfigineqartuni aallaasersornerit pillugit Inatsisartut aalajangiiffigisassaattut siunnersuutip UKA 2013/74-ip, Inatsisartunilu novemberimi 2013-imi akuersissutigineqartup, atuuttussanngortinneqarnissaanik siunnersuutip imaqarnera ataatsimiititaliap maluginiarsimagaa, Naalakkersuisut peqatigisaanik maluginiarpaat. Naak piffissami pisut akornanniittumi pinerluttulerinermi inatsisip allannguutissaanik arlalinnik siunnersuusiortoqartarsimagaluortoq, akuersissuteqarnermit ukiut 6 ingerlareersimalerput. Pinerluttulerinermi inatsimmi allannguutissatut Inatsisartunit Naalakkersuisunut sulissutigeqqullugit peqqussutigineqartuni, allannguutit allat Naalakkersuisunit pingaartinneqarnerusimaneranik tamanna isumaqalersitsisinnaasoq, ataatsimiititaliap oqaatigaa.

Inatsisartut suliniutissatut kissaatigisaannut Naalakkersuisut tunniusimallutik pimoorussillutillu sulissutiginnittarmata, Naalakkersuisut tassunga atatillugu ilisimatitsissutigissavaat, aamma Inatsisartuni aalajangiussat tamarluinnarmik aalajangiunneqarniaraangata naalagaaffeqatigiinni oqartussaasuni immikkut oqartussaasutut ministeeriaqarfinnut ingerlateqqinneqartartut ilisimatitsissutigissalluguttaaq.

Tamanna pillugu suliame uani taama sivisutigisumik ingerlasoqarsimanera Naalakkersuisut ajuusaarutigissavaat.

Suliap massuma Inatsisartunit sularineqarnera pillugu Naalakkersuisut Justitsministeeriaqarfinnut ilisimatitsinerminnut atatillugu, isumaliutissiissummi innersuussutigineqartoq inuiaqatigiinnik kiffartuussinermi tiimit qaffanneqarnissaat pillugu Inatsisartut aalajangiussaata malitseqartissavaat, Justitsministeeriaqarfiullu Inatsisartut suleqatigalugit tulleriarinernik suliaqartarnerani taassuma ilanngunneqarnissaa kissaatigissallugu.

Naalakersuisut taamatut oqaaseqarlutik siunnersuut aappassaaneerpeqarnissaanut
tunniuppaat.